

通

紀

通紀卷第十二

五代

梁太祖

庶人友珪附

末帝

太祖皇帝諱晃本名溫唐帝賜名全忠姓朱氏宋州碭山人祖信父誠世皆微賤誠粗通五經大義以教授爲業帝生夕所居廬舍之上有赤氣上騰里人望之皆驚奔而來曰朱家火發矣及至則廬舍儼然旣而鄰人以誕婉告衆咸異之未冠而孤母王氏攜養寄蕭縣劉宗家帝旣壯不事生業以雄勇自負里人多厭之宗以其慵惰每加譴杖惟崇母自幼憐之親爲櫛髮嘗誡家人曰朱三非常人汝輩當善待之我嘗見麒麟次化爲一赤虵乾符中辭劉氏入黃巢軍以力戰屢捷補爲隊長中和元年西拒邠岐鄜

夏之師于興平所嚮皆立功二年巢以帝爲同州防禦使使自攻取聞巢軍勢蹙諸校離心帝遂斬僞監軍使嚴實舉郡降王重榮即日飛章上奏時僖宗在蜀聞之喜曰天賜予也乃授帝左金吾大將軍充河中行營副招討使仍賜名全忠自是帝帥所部與河中兵士偕行所向無不克捷三年蔡州刺史秦宗權與黃巢餘孽合從肆虐共圍陳州僖宗命帝爲東北面都招討使帝領兵於鹿邑與巢衆相遇縱兵擊之斬首二千餘級四年收西華寨巢遁去帝遂入陳是時河東節度使李克用奉僖宗詔同謀破賊與帝合勢於中牟北邀擊之賊衆大敗於王滿渡多束手來降時賊將霍存葛從周張歸厚張歸霸皆

匍匐馬前悉宥而納之是歲黃巢雖沒而秦宗權繼
爲巨孽攻陷鄰郡殺掠吏民屠害之酷更甚巢賊
昭宗龍紀元年蔡都將郭璠執宗權來獻帝檻宗
權送於長安斬於獨柳樹下昭宗進封帝東平王帝
擒濮州邵儒梟徐州時浦之首平兗朱鄆朱南伐南
密行北侵並拔瀛莫二郡攻中山定繼爲所敗由
是河朔皆弭伏焉是歲唐左軍中尉劉季述幽昭宗
於東內立皇子德王裕爲帝仍遣其養子希度來言
願以神器輸於帝帝方在河朔遽還于汴會李振自長
安使迴因言于帝曰夫豎刁伊戾之亂所以資霸者
之事今閹豎幽辱天子王不能討無以令諸侯帝悟
因請振復使于長安與時宰潛謀反正侍衛將軍

孫德昭以下誅劉季述迎昭宗反正改元天復進封
帝爲梁王酬反正之功也朝廷旣誅劉季述以韓全
誨張宏彥爲兩軍中尉宰相崔胤每事裁抑官官
宦官側目昭宗不得已罷崔胤知政事崔胤怒急召太祖
請以兵入輔帝行次零口聞長安亂昭宗爲闔官韓
全誨等劫遷西幸鳳翔避帝之兵鋒也翌日遂命旋
師自赤水次咸陽岐人大將苻道昭領兵萬人屯武
功以拒帝帝遣康懷英敗之且移軍北伐二年六月
帝復西征次于虢縣與岐軍大戰殺萬餘衆擒其
將校數百人九月帝以岐人堅壁不戰思欲旋旆以歸
河中親從指揮使高季昌曰天下雄傑窺此舉者一
歲矣今岐人已困願少俟之帝乃命季昌密募人入

岐以紿之騎士馬景堅願應命許之明日景躍馬西走直叩岐闔詐以軍怨東遁爲告且言列寨尚留萬餘人夕將遁矣宜速掩之李茂貞信其言遽啓二扉悉衆來寇時諸軍已介馬待之中軍一鼓百啓俱進又分遣數百騎以據其闔岐人進不能駐其趾退不能入其壘殺戮蹂踐不知其數茂貞喪膽議誅閹寺以自贖焉三年昭宗遣中使押送韓全誨以下二十餘人首級以示帝發離鳳翔幸左劔寨帝素服待罪昭宗命學士傳宣免之帝即入見稱罪拜伏者數四旣而促召升殿密通御座且曰宗廟社稷是卿再造朕與戚屬是卿再生因解所御玉帶面以賜帝昭宗至長安謁太廟御長樂樓禮畢願謂帝曰今日得親奉觴酒

奠於先皇帝室前卿之德朕不能報矣伐青州楊師厚率大軍與王師戰于臨朐青軍大敗師範舉城請降青州平分命將校略地於登萊淄棣等州皆下之由是東漸于海皆爲梁土也十月有大聲出於梁邸之廳事帝其驚駭占者曰當有大慶三年帝果即位於此四年帝將議迎駕東幸洛陽慮大臣不從密令護駕都指揮使朱友諒矯昭宗命收宰相崔允京兆尹鄭元規等殺之時又邠岐兵士侵逼京畿帝因是上表堅請昭宗幸洛昭宗不得已從之駐蹕於陝帝自河中來覲謁見於行營因洒涕言曰李茂貞等竊謀禍亂將迫乘輿老臣無狀請陛下東遷爲社稷大計也昭宗延帝於寢室見何皇后面賜酒器及衣

物何后謂帝曰此後大家夫婦委身於全忠矣因泣下帝辭歸洛陽昭宗開內宴時有宮人與昭宗附耳而語韓建躡帝足帝遽出以爲圖已因連上章請車駕幸洛昭宗累遣中使傳宣謂帝曰皇后方在草蓐未任就路帝以陝州小藩非萬乘久留之地請以四月內東幸閏月昭宗發自陝郡次于穀水左右唯小黃門及打球供奉內園小兒共二百餘人帝猶忌之是日密令醫官許昭遠告變乃設饌於別幄召而盡殺之皆坑于幕下先是選二百餘人形貌大小一如內園人物之面至是使人擒一人縊於坑所即蒙其衣及戎具自飾昭宗初不能辨久而方察自是昭宗左右前後皆梁人矣車駕至洛入宮是日大風晝暝改元天

祐八月昭宗遇弒於大內遺制以輝王祝爲嗣二年
天子命帝爲相國摠百揆以荆南等二十一道爲魏國
進封魏王兼備九錫之命爲天下兵馬元帥四年天
子遣御史大夫薛貽矩來傳禪代之意帝家廟棟間
生五色芝狀如芙蓉紫煙蒙護數日不散又府第前
舊有苦井是日忽變爲甘其味如醴福建道使持
牋幣來聘仍以白鸚鵡一同獻自是旬浹之內諸州
郡繼以白鳥白兔白蓮並蒂者相次來上此日金
行應運之兆也又帝之家廟第一室神主上有五色
衣自然而生四月降御札傳禪于帝出傳國寶玉冊
受禪寶及文物儀仗朝于梁國庾戌帝御金祥殿
初受百官稱臣下書稱教令□□宰臣百官各押本

司法物於正殿前習儀乃下教令改名是令有司分告天地宗廟其舊名中外章疏不得更有去避甲子宰臣張文蔚已下押冊自上源驛登輅車諸司各備威儀金吾仗鹵簿道引文武百官新羅勅海質子及親王隨寶冊列於殿前帝郊時被袞冕升御座受冊司天監伏躬奏符瑞之驗於是宰臣百官蹈舞稱賀按握升樞記曰黑衣神孫披天裳兔子持函上天牀黑衣神則北方之神北方主水火爲水之孫王南方南爲朱方朱帝之姓也帝復以丁卯火年夏四月受唐禪又讖曰承唐祚者坐在龜頭號初年中有一市在臣邊坐在龜頭是元字號初年亦元字也市在臣邊是師字故帝自元師踐天子之位先是唐乾

符中木星入于南斗王鐸問邊崗曰是何祥也崗曰
木星入斗帝王之兆也然不於今其在後乎木在斗
中於文爲朱字當有朱氏王天下者木數三其應在
三紀乎至是果驗焉又天后朝有識辭士首尾三鱗
六十年兩角犢子自狂顛龍蛇相關血成川解者云
兩角犢子牛也必有牛姓于唐祚故周子諒彈牛仙
客李德裕謗牛僧孺皆以應圖識爲辭然朱字牛
下安八八即角之象也故朱滔朱泚構亂常之禍冀
無妄之福豈知應之帝也改元開平國號大梁以曹
州濟陰之邑奉唐主封爲濟陰王升汴州爲開封府
建名東都其東都改爲西都皇長男友文封博王友
珪封郢王友璋封福王友貞封均王友雍封賀王友

徽封建王以薛貽矩平章事二年河東節度使李克
用薨帝聞之喜詔諭中外其略曰楊行密方命討除
不經年而自滅李克用纔行削奪未逾歲而去亡皆
憑天命之誅不假兵威之勢

中和四年帝與克用同破賊帝於上源驛宴克用任事帝使甲士

攻之克用適去自此懷隙

乾寧三年葛從周與克用男落落戰洹水擒落落以獻斬之天復二年朱友寧與晉軍戰擒克用男廷為以獻

三月以鴻臚卿李從為二王後封萊國公四年泛九曲
池御舟傾帝墮溺於池中宮女侍官扶持登岸乾化
二年車駕至西京時帝疾大漸因謂近臣曰我三十年
經營王業不意太原餘孽復此請張我觀所為其志
不小天復使我短命身後必無奈何我料諸兒咸非
彼敵吾死其無葬地矣言次氣絕久而方蘇友珪帝
第二子母亳州之營妓唐光啓中帝徇地于亳州召

而侍寢娠及期奴以生男告故帝字之曰遙喜帝受
禪封郢王帝不豫動多蹀躞友珪因事遭杖心不自
安時東京留守博王友文者帝之養子其妻王氏
甚有姿色帝潛亂之帝未遇弑前旬日謂王氏曰
吾終不起此疾召友文來吾與之決蓋意有所屬
且友珪妻張氏容色冠代帝亦嬖之皆廉知其事乃
告友珪曰大家以傳國爾王授王氏令懷往東京公將
及禍矣友珪憂恐知不保全夕乃易服微行入左龍
虎軍見統軍韓勅備告帝末年勲臣伯將多以非
罪見誅勅亦懼死乃共畫弑逆之謀是夜勅以牙
兵五百人雜控鶴軍士伏禁中夜三鼓斬關及萬春
門至帝寢殿侍疾者比日驚走帝惶駭而起帝曰我

疑此賊久矣恨不早殺爾友珪之親信馮廷諤刺帝
遂崩于內年六十一友珪自以苗裔累之瘞於寢室翊
日遣受旨丁昭溥賁偽詔赴東京誅博王友文發喪
友珪矯遺制於柩前即位謚帝曰神武元聖孝皇帝
廟號太祖葬宣陵改乾化三年爲鳳歷元年洛軍大
擾先犯宮禁友珪聞亂引妻張氏及親校馮廷諤趨
北垣樓下知事不濟令廷諤先刃其妻及已廷諤亦
自剄焉友珪年二十八末帝即位乃貶友珪爲庶人
末帝諱瑱初名友貞太祖第四子母元貞皇后張氏
封均王美容儀性沈厚寡言雅好儒士庶人友珪弑
逆矯太祖詔至東京密令帝害友文友珪即位以帝
爲東京留守友珪篡逆羣情不附會趙巖至東京

帝以誠款謀之巖時典禁軍還洛以謀告侍衛親軍
素象先僞鳳歷元年二月象先引禁兵千人突入宮
城遂誅友珪象先遣趙巖賁傳國寶至東京請帝即
位於洛陽帝報之曰夷門太祖創業之地居天下之衝
北拒并汾東制淮海國家藩鎮多在關東命將出師
利於便近若都洛下非良圖也公等如堅推戴冊禮
宜在東京是月即位於東京去鳳歷之號稱乾化三
年帝姑息大臣親任駙馬趙巖宣徽使趙鵠德妃張
氏兄弟漢傑漢倫干預權柄宰臣敬翔宗政使李振
並罹讒間貞明元年魏博節度使楊師厚薨以賀德
倫代其任三月二十九日夜魏軍作亂執德倫囚於別
館盡殺其部衆爲亂首張彥所迫遣使歸款於太原

原

晉王

口晉社宗也

排陣使謝彥章青人所憚賀瓌朱珪協謀

因享士伏甲以殺彥章以謀叛聞晉王聞之喜曰彼將帥如是亡無日矣龍德二年四月晉王即唐帝位於魏州十月唐帝引師龍中都王彥章兵潰於是彥章與監軍張漢傑等皆為唐人所獲帝聞中都之敗唐軍長驅將至時禁軍尚有四千人朱珪請以拒唐軍帝不從或勸帝西奔洛陽趙巖曰勢已如是下此樓誰心可保乃止俄報曰晉軍過曹州矣帝置傳國寶於卧内俄失其所在已為左右所竊迎唐帝矣帝召控鶴指揮使皇甫麟曰吾與晉人世讎不可俟彼刀鋸卿可盡我命無令落讎人之手麟進刃建國樓之廊下帝崩麟即時自剄初許州獻綠毛龜宮中

造室以蓄之命曰龜堂帝嘗市珠於市旣而曰珠
數足矣衆皆以爲不祥之言帝貞明中改瑱或解
去瑱字一十二月一八日果以一十一年至十月九日亡
唐帝入汴聞帝殂憮然嘆曰敵惠敵怨不在後嗣朕
與梁主十年對壘恨不生見其面尋詔張全義葬
之其首藏於大社晉天福中詔唐朝罪人首級許親
屬及舊家收葬并左衛將軍安崇阮收葬焉

右梁自太祖至末帝共二帝凡十七年入後唐

通紀卷第十二

通紀卷第十三

五代

後唐太祖

莊宗

明宗

閔帝

末帝

太祖武皇帝諱克用本姓朱耶氏其先隴右金城人
曾祖盡忠為沙陁府都督祖執宜蔚州刺史追尊昭
烈皇帝烈考國昌本名赤心討龐勛有功懿宗賜姓
李氏名國昌籍係鄭王房追謚文皇廟號獻祖帝
即獻祖第三子母秦氏在姪十三月載誕之際母艱
危者竟夕族人憂駭市藥於鴈門遇神叟曰非巫醫
所及可馳歸盡率部人被甲持旄擊鉦鼓躍馬大
譟環所居三周而止族人如其教果無恙而生時虹
光燭室白氣充廷井水暴溢帝始言喜軍中語齟

齒善騎射年十三見雙鳧翔空射之連中衆皆臣
伏新城北有毗沙天王祠祠前井一日沸溢帝因持卮
酒而奠曰子有尊主濟民之志無何井溢故未察其
禍福惟天王若有神奇可與僕交談奠酒未已有神
人披金甲持戈隱然出於壁間見者大驚走惟帝從
容而退由是益自負獻祖之討龐勛也帝年十五從
征摧鋒陷陣出諸將之右軍中目為飛虎子賊平授
帝雲中牙將黃巢渡江其勢滋蔓天子以帝為大同
軍節度使獻祖出師討党項吐渾赫連鐸珠虛陷振
武舉族為吐渾所虜至定邊軍迎獻祖歸雲州雲州
守將不納帝略尉朔之地得三千人屯新城赫連鐸
晝夜攻圍俄而獻祖引軍至吐渾退走天子命赫連鐸

進軍討帝獻祖率其族奔於達靼部中和元年天子
令李友金發五百騎賁詔召帝於達靼帝即率達靼
諸部萬人趨鴈門整兵南嚮京師二年獻祖自達靼
部率其族歸代州三年帝大敗巢軍於零口進收京
師帝既收長安軍勢甚雄諸侯之師皆畏之帝一目微
眇時號為獨眼龍許帥田從異汴帥朱溫徐帥時溥
各遣使來告以巢蔡合縱兇鋒尚熾請帝共力討賊
四年帝合徐汴之師攻賊於西華賊將黃鄴奔營而
遁是夜大雨巢營中驚亂退營陳州北五月大雨震
雷平地水深數尺賊營為水所漂而潰帝大破賊於
王滿渡賊衆分寇汴境帝渡汴遇賊將渡而南半濟
擊之大敗臨陣斬賊將王齊安楊景虎是夜黃巢携

妻子東走是月班師過汴朱溫延請宴於上源驛醉夜
伏兵謀害帝遇大雨震電得從者薛鐵山等數人扶
掖隨電光而行登尉氏門縋城而歸自是與朱溫構
怨也至太原帝自累立大功為汴帥怨圖陷沒諸將
乃上章申理帝表至朝廷大恐加太傅同平章事隴西
郡王光啓二年僖宗幸興元朱玫於鳳翔立嗣襄王
煬為帝以偽詔賜帝帝燔之械其使馳檄諸方鎮遣
使奉表於行在昭宗乾寧二年鳳翔李茂貞邠州王
行瑜華州韓建稱兵向闕同弱王室殺害宰輔帝率
蕃漢之師討亂十一月收龍泉寨時行瑜以精甲五千
守之李茂貞出兵來援為李罕之所敗行瑜復入邠
州大軍進逼其城行瑜登城號哭曰行瑜無罪昨殺南

北司大臣是岐帥將兵脅制主上請治岐州行瑜乞
束身歸朝帝曰僕受命討三賊臣公其一也如能束身
歸闕為公奏取進止行瑜懼弃城而遁既而慶州奏
王行瑜將家屬五百人到州界為部下所殺傳首闕
下帝既平行瑜還軍渭北天子進封帝晉王帝復上
表請討李茂貞天子不允帝私謂詔使曰觀主上意
疑僕別有佗腸復何言哉但禍不去貽憂患未已三
年帝與汴軍戰於洹水之上鐵林指揮使落落被擒
落落帝長子也既戰馬蹕於坎帝馳騎以救之其馬
亦蹕追兵將及帝背射一發而斃乃退天復元年汴將
張存敬迫河中王珂告急於帝珂妻帝愛女也亦以
書至懇切求援帝報曰賊阻道路衆寡不敵殺爾即

與爾兩亡可與王郎弃城歸朝珂遂送款於張存敬
尋徙于汴帝自是不復能援京師霸業由是中否天
祐元年朱友恭弑昭宗告哀使至晉陽帝南向慟哭
三軍縞素四年哀帝禪位於汴帥是歲西川王建遣
使至勸帝各王一方帝不從五年帝疾崩於晉陽年
五十三壯宗即位追謚武皇帝廟號太祖陵在鴈門
莊宗皇帝名存勗太祖長子母貞簡皇后曹氏帝在
妊時后夢神人黑衣擁扇夾侍左右載誕之日紫氣
出於窓戶及為嬰兒體白奇特沉厚不居年年十一從
太祖討王行瑜令入覲獻捷昭宗一見駭之曰兒將來
之國陳勿忘忠孝於予家因賜鵝酒卮翡翠盃
子授檢校司空隰州刺史改汾晉二郡皆遙領之帝

洞曉音律十三習春秋手自繕寫略通大義及壯便
騎射膽略絕人其心豁如也太祖起義雲中部下皆
北邊勁兵及破賊迎鑾功居第一由是稍優寵士伍
因多不法帝不平之因啓於太祖太祖依違之天祐
五年太祖厭代帝乃嗣王位於晉陽年二十四振武軍
節度使克寧帝季父也克寧妻激怒克寧陰圖禍
亂監軍使張承業命李存璋伏甲以誅克寧時梁
祖自將兵至澤州帝召周德威軍歸晉陽梁祖亦
歸洛帝知其無備乃謂其將曰汴人聞我有喪必謂
不能興師解圍定霸在此一役軍發自太原伏三重崗
直抵夾城李嗣源攻東北隅李存璋王霸燒寨斷夾
城爲二道周德威李存審各分道進攻軍士鼓譟三

道進攻斬首萬級獲其副招討使符道昭大將三百人梁主聞其敗也既懼而嘆曰生子當如是李氏不亡矣吾家諸子乃豚犬爾初帝繞五歲從太祖校獵於三垂崗岡上有元宗原廟太祖於相前置酒樂作伶人奏百年歌者陳其衰老之狀聲詞悽苦太祖引滿捋髮指帝曰老夫壯心未已二十年後此郎子必戰於此及是役也果符其言焉帝班師下令於國中禁盜賊恤孤寡徵隱逸止貪暴峻隄防寬獄訟朞月之間其俗丕變帝每出於路遇飢寒者必駐馬臨問人情大悅王霸之業自此而基矣七年十二月梁祖命王景仁討鎮州王鎔營於栢鄉帝親征八年正月周德威與梁軍轉戰至高邑南李存璋引諸軍陣於

野河之上鎮定之師與血戰梁軍敗而後整者數四
自己及午騎軍接戰至晡梁軍欲抽退塵埃漲天德
威周麾而呼曰汴人走矣李嗣源率親軍與史建塘
等夾攻梁軍大敗奔鎰投仗之聲震動天地龍驤神
威神捷諸軍殺戮殆盡自陣至栢鄉數十里殪尸枕藉
敗旗折戟所在蔽地夜漏一鼓帝入栢鄉梁軍輜重帳
幄資財奴僕皆為帝軍所有幽州劉守光僭稱大燕
皇帝年號應天十年帝親征幽州擒劉仁恭檀州燕樂縣
人執劉守光并妻李氏祝氏子繼祚以獻帝虜仁恭
父子以行十一年春至晉陽誅守光遣李存霸拘送仁
恭于代州刺其心血奠告于太祖陵然後斬之十二年魏軍
士張彥追賀德倫上章梁末帝請復六州之地末帝不從

遂迫德倫歸於帝。事具梁末帝篇。秋，梁將劉鄩軍於莘縣。帝營於莘西，日夕交鬪。十三年，劉鄩謂帝已歸。晉陽將乘虛襲鄩。鄩自莘引軍至城東，與其將楊延直兵會。俄而帝自貝州至。鄩卒見帝，驚曰：「晉王邪？」兩軍初合，梁軍稍衄，再合。鄩引騎軍突西南而走。是月，劉鄩敗於莘縣。王檀遁於晉陽。梁王聞之，曰：「吾事去矣！」十五年，帝自魏州率師次於楊。劉略地至鄆濮而還，遂營於麻家渡，列營十數。梁將賀瓌、謝彥章以軍屯濮州，行臺村結壘相持百餘日。帝嘗以數百騎摩壘求戰，謝彥章率精甲五千伏於堤下。帝以十餘騎登堤，伏兵發，圍帝十數重。帝之騎軍繼至，攻於圍外。帝於圍中躍馬奮擊，決圍而出。時帝銳

於接戰每馳騎出營李存審必叩馬進諫帝伺存審有間即策馬而出至是幾危方以存審之言為忠也十二月帝與梁軍戰於胡柳陂周德威戰歿是時陂中有土山梁軍數萬先據之帝帥中軍至山下梁軍嚴整不動旌旗甚盛帝呼諸軍曰今日之戰得山者勝賊已據山吾與爾等各馳一騎以奪之帝率軍先登銀槍步兵繼進遂奪其山梁軍紛紜而下復於土山西結陣數里時日已晡矣或曰諸軍未齊不如還營詰朝可圖再戰閻寶進曰深入賊境逢其大敵期於盡銳以決雌雄況賊帥奔亡衆心方恐今乘高擊下勢如破竹矣王建及乃大呼以奮擊諸軍繼之梁軍大敗遂拔濮陽十八年魏州開元寺僧傳真獲傳国

寶獻於行臺驗其文即受命寶之八字二十年三月築壇於魏州牙城之南四月己巳帝昇壇祭告昊天上帝遂即皇帝位改天祐二十年為同光元年以盧瑋平章事詔昇魏州為東京三年依舊以洛州為東都魏州改為鄴都是月追尊曾祖為昭烈皇帝廟號懿祖皇祖為文景皇帝廟號獻祖白圭考為武皇帝廟號太祖詔於晉陽立宗廟以高祖神堯皇帝太宗文皇帝懿宗昭聖皇帝昭宗聖穆皇帝及懿祖已下為七廟十月帝御大軍攻中都擒梁將王彥章都監張漢傑等將吏二百餘人斬馘二萬時既獲中都之捷帝召諸將謀其所向惟李嗣源曰宜急趨汴州此去汴州咫尺若晝夜兼程信宿即至段凝未起河壩夷門已為我有矣且請以千騎前

驅陛下御軍徐進鮮不克矣帝喜翌是夜嗣源率前
軍先進翌日車駕即路曹州郡將出降前軍至汴城
嗣源令左右捉生攻封邱門梁開府尹王瓚請以城
降俄而帝與大軍繼至王瓚迎帝自梁門入梁朝文武
官屬於馬前謁見陳叙世代唐臣陷在偽廷今日再
覩中興雖死無恨帝諭之曰朕二十年血戰蓋為卿等
家門無足憂矣各復乃位時梁末帝朱鋹已為其將
皇甫麟所殺獲其首函之以獻周匝者帝之寵伶也
胡柳之役陷於梁帝每思之至是謁見欣然慰接周
匝因言梁教坊使陳俊保庇之恩推薦請除郡守帝
許之三年陳俊為景州刺史徵德謂為憲州刺史此皆梁之伶人也梁將段凝等率大將先至
請死詔各賜錦袍御馬金幣凝上疏奏梁朝權臣趙

嚴等並助成虐政結怨於人聖政惟新宜誅首惡是日趙巖等并妻孥皆斬汴橋下二年詔鹽鐵度支戶部並委祖庸使管轄吏人孔謙酷加賦歛赦文之所原放謙復刻剝不行大失人心始於此矣三年鍾武軍節度使朱守躬奏昨修月陂隄至德宮南獲玉璽一紐獻之其文曰皇帝行寶四字背紐交龍光瑩精妙詔括天下私馬將伐蜀帝令李嚴往市蜀中珍玩蜀法嚴峻不許竒貨東出其許市者謂之入草物嚴歸而奏之帝大怒九月命魏王繼岌郭崇韜等大舉伐蜀十月蜀主王衍出降大軍入成都自興師凡七十五日蜀平得兵士三萬錢一百九十二萬貫金銀共二十二萬兩珠玉犀象二萬紋錦綾羅五十萬得節

度州十郡六十四縣二百四十九年魏王繼岌殺樞密使郭崇韜於西川夷其族朱友諒當國法帝素寬大容納無疑於物自誅郭崇韜朱友諒之後閹豎伶官交相讒諂邦國大事皆聽其謀繇是漸多猜惑不欲大臣典兵趙在禮反亂軍逼李嗣源帝河北具明宗篇詔河南借今年租稅時年饑民困百姓不勝其酷宰臣豆盧革率百官上表以魏博軍變請出內府金帛優給將士不報時知星者上言客星犯天庫宜散府藏又云流星犯天棊主御前有急兵帝召宰臣於便殿皇后出宮中粧奩銀盆各二并皇子滿哥三人謂宰臣曰外人謂內府金寶無數向者諸侯貢獻旋供賜與今宮中有者粧奩爾女孺而已可鬻鬻之給軍革等惶恐而

退是時軍士之家乏食婦女掇蔬於野及優給軍人
皆負物而詣曰吾妻子已殍矣用此奚為甲子元行
欽自衛州率部下兵士歸京帝幸耀店以勞之西川
輦運金銀四十萬至闕分給將士有差元行欽請車
駕幸汴州發京師是時李嗣源已入於汴帝聞諸軍離
散精神沮喪至萬勝鎮即命旋師帝過魏子谷道路
險狹每遇衛士執兵仗者皆善言撫之曰適報魏王
繼岌又進劔西川金銀五十萬到京當盡給爾等軍
士對曰陛下賜與太晚人亦不感聖恩帝流涕而已又
索袍帶賜從官內庫使張容哥對曰頒給已盡衛士
叱容哥曰致吾君社稷不保是此闖豎抽刀逐之或救
而獲免容哥謂同黨曰皇后惜物不散軍人歸罪於

吾輩事若不測吾輩萬段願不見此禍因投河而死
甲戌次石橋帝置酒野次悲啼不樂謂元行欽等諸
將曰鄴下亂離寇盜蜂起揔管迫於亂軍存亡未測
今訛言紛擾朕實無聊卿等事予已來富貴急難無不
共之今茲危蹙賴爾籌謀而竟默默無言坐觀成敗
行欽等百餘人垂泣而奏曰臣本小人蒙陛下撫養位
極將相危難之時不能立功報主雖死無以塞責乞
申後効以報國恩於是百餘人皆拔刀截髮置鬚於地以
斷首自誓上下無不悲號識者以為不祥帝還宮樞
密使李紹宏與宰相豆盧革常說會於中興殿之廊
下商議軍機因奏魏王西征兵士將至車駕且宜控
汜水以俟魏王從之車駕將發京師從駕馬軍陳於

寬仁門外步兵陳於五鳳門外帝內殿食次從馬直指
揮使郭從謙自本營率所部抽戈露刃至興教門大
呼與黃甲兩軍引弓射興教門帝聞其變自宮中率
諸王近衛禦之逐亂兵出門既而焚興教門緣城而入
登宮牆譙諫帝御親軍格鬪殺亂兵數百俄而帝為
流矢所中亭午崩於絳霄殿之廡下時年四十二是時
帝之左右列皆奔散唯五坊人善友歛廊下樂器族
於帝屍之上發火焚之及明宗入洛止得其燼骨而已
天成元年七月丁卯有司上謚曰光聖神閔孝皇帝廟
號莊宗是月丙子薨於雍陵

明宗皇帝諱亶初名嗣源其先代北人世事太祖及
錫姓遂編於屬籍追尊四代祖聿為孝恭皇帝曾

祖教爲孝質皇帝祖炎爲孝靖皇帝考覲孝成皇
帝帝即孝成元子母孝成懿皇后劉氏初孝成事從
唐獻祖爲愛將獻祖之失振武爲吐渾所攻部下離
散孝成獨奮忠義解蔚州之圍太祖之鎮鴈門也孝
成厭代帝年甫十三善騎射獻祖見而撫之曰英氣
如父可侍吾左右每從圍獵仰射飛鳥控弦必中尋
隸太祖帳下太祖遇上源之難將佐多維害者其衆帝
時年十七翼武皇脫難於亂兵流矢之內獨無所傷
帝嘗宿於鴈門逆旅逆旅媼方娠不時具饌媼聞腹
中兒語云大家至速宜進食媼異之親奉庖爨其恭
帝詰之媼告其故帝旣壯椎武獨斷謙和下士每有
功未嘗自伐凡所賜與分給部下梁人攻兗鄆鄆帥

朱瑄求救太祖遣帝率二百騎敗汴軍於任城太祖嘉其功即以所屬五百騎號曰橫衝都侍於帳下故兩河閒目帝為李橫衝天祐五年栢鄉之役莊宗勦壯之曰卿見南軍白馬赤馬都否覩之令人膽破帝曰彼虛有其表耳翌日當歸吾廐中即屬韃揮弭躍馬挺身與其部下百人直犯白馬都奮槌舞稍生挾二騎校而迴是日梁軍大敗以功授代州刺史莊宗遣周德威伐幽州帝分兵略定山後八軍與劉守光愛將元行欽戰於廣邊行欽窮蹙面縛乞降十三年莊宗與梁將劉鄩大戰於元城北帝以三千騎擊鄩軍殆盡十四年契丹何保機率衆三十萬攻幽州帝舞槌奮擊萬衆披靡挾其酋帥而還虜衆大敗委弃鎧仗羊馬殆不勝紀莊宗

即位於鄴宮時天祐二十年改元同光帝進位檢校太傅兼侍中尋命帝率步騎五千襲鄆州下之梁人陷德勝南城圍楊劉以扼出師之路帝孤守汶陽四面拒寇久之莊宗方解楊劉之圍九月梁將王彥章以步騎萬人迫鄆州自中都渡汶帝長子從珂獲梁將任釗等三百人彥章退保中都莊宗聞其捷自揚劉引軍至鄆以帝為前鋒大破梁軍於中都生擒王彥章等是日帝勸莊宗徑取汴州帝先至汴州聞梁主已殂莊宗到帝迎謁路側莊宗大悅手引帝衣以頭觸帝曰吾有天下由公之血戰也當與公共之進位兼中書令三年潞州小將楊立叛帝受詔討之擒楊立以獻進位太尉移鎮汴州為蕃漢總管契丹入寇三年破虜衆於

涿州移授鎮州節度使先是帝領兵過鄴鄴庫取御
甲五百聯以行莊宗知之怒甚帝上表申理方解十
二月帝朝於洛陽時莊宗失政四方饑饉軍士匱乏有
賣兒貼婦者道路怨咨帝在京師頗爲謠言所屬洎
朱友謙郭崇韜無名被戮中外大臣皆懷憂懼諸軍
都虞候朱守殷奉密旨伺帝起居守殷陰謂帝曰
德業震主者身危功蓋天下者不賞公可謂震主矣
且自圖之無與禍會帝曰吾心不負天地禍福之來
吾無所避付之於天卿勿多談四年趙在禮據魏州反
元行欽攻之不利退保衛州帝將兵渡河三月六日帝至
鄴都趙在禮等登城謝罪出牲餼勞師帝納之八日
夜五鼓亂軍逼帝帝河北安重誨霍彥威躡帝足請

詭隨之入鄴城在禮寺奉迎帝謂在禮曰欲建大計
非兵不能集事吾自於城外招撫諸軍帝乃得出發
魏縣歸闕元行欽保衛州果以飛語上奏帝上章申
理莊宗遣帝子從審齎詔諭帝從審至衛州爲行
欽所械帝奏章亦不達帝乃趨白皋半渡駐軍於河上
及將濟舡少帝方憂之忽有木筏數隻汭流而至即
用以濟師故無留滯焉至汴州莊宗遣姚彥溫爲前
鋒彥溫率八百騎于帝具言主上爲行欽所惑事勢
已離難與共事帝曰卿自不忠言何恃也乃奪其兵
四月至嬰兒子谷聞蕭牆變作莊宗晏駕帝慟哭不自
勝詰旦朱守殷遣人報京城大亂請帝速至京師時
莊宗子繼岌征蜀未還帝至洛陽羣臣諸將勸進帝

面諭止之文武百寮三拜牋請行監國之儀荅旨從之霍彥威孔循等請改國號帝問藩邸侍臣左右奏曰先帝以錫姓宗屬爲唐雪寃以繼唐祚今梁朝舊人不願殿下稱唐請更名號帝曰予年十三事獻祖以予宗屬受幸不異所生事武皇武皇太祖也三十年排難解紛櫛風沐雨冒刃血戰體無完膚武皇功業即予功業先帝天下即予天下兄亡弟紹於義何嫌且同宗異號出何典禮庚子下敕誅租庸使孔謙停租庸名額依舊爲鹽鐵戶部度支三司委宰臣豆盧革專判丙午於莊宗柩前即位改元天成三年追尊四廟詔施翹禁於秋苗上徵納翹價出五錢時孔循以翹法殺一家於洛陽或獻此議以爲愛人便國

故行之襄邑民聞威父爲人所殺有狀和解特勅處死和
疑奏應補齋郎並須引驗正身舊制使陰一任官補一
人今後改官須轉品即可如無子許以親姪繼限念
書十卷試可則補從之帝問古鐵券如何趙鳳對曰
帝王誓文許其子子孫長享爵祿帝曰先朝所賜
唯朕與郭崇韜李繼麟三人爾崇韜繼麟尋已族滅
朕之危疑慮在旦夕鳳曰帝王執信故不必銘金鏤石矣
四年併吏部三銓爲一銓宜令本司官負同商量主擬連
署申奏仍不得於私第注官長興元年翰林學士
劉昫奏新學士入院舊試五題請停試詩賦氏試麻
制荅蕃書批荅共三道張延朗為三司使有使領自中書奏
吏部流內銓諸色選人所試判兩節度欲委定其等

第文優者超一資次者依資又次者以同類道理全
疎者於同類中少人戶處注擬從之二年詔諸州府城
郭內依舊禁麴其官中自造減舊價之半化其賣應田
畝上所徵麴錢並放鄉村人戶一任私造時甚便之三
年帝謂宰臣曰春雨稍多久未晴霽何也馮道對曰
水旱作沴雖是天之常道然季春行秋令臣之罪也
更望陛下廣敷恩宥久雨無妨於聖政也十月大理少
卿康澄上疏曰臣聞安危得失治亂興亡誠不繫於天
時固非由於地利童謠非禍福之本祚祥豈隆替之
源故雖雉升鼎而桑穀生朝不能止殷宗之盛神馬
長嘶而玉龜告兆不能延晉祚之長是知國家有不
足懼者五有深可畏者六陰陽不調不足懼三辰失

行不足懼小人訛言不足懼山崩川涸不足懼蟲賊
傷稼不足懼此不足懼者五也賢人藏匿深可畏四民遷
業深可畏上下相徇深可畏廉耻道消深可畏毀譽
乱真深可畏直言蔑聞深可畏此深可畏者六也然而
不足懼者願陛下存而勿論深可畏者願陛下修而
靡忒加以崇三綱五常之教敷六府三事之歌則洪
基與五岳爭高盛業共磐石永固優詔獎之四年帝
於便殿問范延光内外見營馬數對曰三萬五千匹帝
歎曰太祖在太原騎軍不過七千先皇自始至終馬纔
及萬今有鐵馬如是而不能使九州混一是吾養士練
將之不至也吾老矣馬將奈何延光奏曰臣每思之因
家養馬太多試計一騎士之費可贍步軍五人三萬五

千騎抵十五萬步軍既無所施虛耗国力臣恐日久難繼帝曰誠如卿言肥騎士而瘠吾民民何益哉帝不豫因唾出肉片如肺者數片便溺升餘至曙帝小康秦王從榮領兵陣於天津橋禁軍拒之從榮敗奔河南府遇害帝聞之繇是不豫崩於大內壽六十七謚曰聖德和武欽孝皇帝廟號明宗葬徽陵

閔帝諱從厚小字菩薩奴明宗第三子母昭懿皇后夏氏帝齠齔好讀春秋略通大義封宋王鎮鄴都同母兄秦王從榮誅明宗遣宣徽使孟漢瓊馳駟召帝明宗崩帝至自鄴於柩前即位改元應順西京留守王思同奏鳳翔節度使潞王從珂拒命取亳州團練使李重吉潞王之長子幽於宋州帝聞西師成叛

遣使殺之大軍進攻鳳翔山南軍潰帝聞之謂康義誠等曰朕幼年嗣位委政大臣兄弟之間必無榛梗諸公大計見告朕獨難違事至於此何方轉禍朕當與左右自往鳳翔迎兄主社稷朕當歸藩於理為便朱宏昭馮贇不對義誠曰西師驚潰蓋由主將失策臣請自往開西扼其衝要詔侍衛安從進京城巡檢是日從進已得潞王書檄潛布腹心矣從進尋殺馮贇於其第是夜帝以百騎出元武門至衛州東七八里遇騎從自東來不避左右叱之乃曰鎮州節度使石敬瑭也帝喜敬瑭拜舞於路帝下馬慟哭諭以潞王危社稷康義誠以下叛我無以自庇長公主見教逆爾於路謀社稷大計敬瑭曰衛州王宏贇宿

舊諸事且就宏贄圖之宏贄曰天子避狄古亦有之
然於奔迫之中亦有將相國寶法物所以軍長瞻奉
不覺其亡也今以五十騎奔竄無將相一人擁從安排
興復大計所謂蛟龍失雲雨者也今六軍將士摠在
洛邸矣公縱以戚藩念舊無奈之何遂與宏贄同謁
於驛亭敬瑭以宏贄所陳以聞弓前使沙守榮奔
洪進前謂敬瑭曰主上即明宗愛子公即明宗愛婿
富貴既同受戚休合共之今謀於戚藩欲期安復翻
索從臣國寶欲以此爲辭爲賊筭天子邪乃抽佩刀
刺敬瑭敬瑭親將陳暉扞之守榮與暉單戰而死洪
進亦自劉敬瑭盡誅帝之從騎五十餘輩獨留帝於
驛乃馳騎趨洛四月潞王即位廢帝爲鄂王遇鳩崩衛

州時年二十一。是日辰時白虹貫日。晉高祖即位。謚曰閔。葬徽陵。

末帝諱從珂。本姓王氏。鎮州人。母宣懿皇后魏氏。明宗略地至平山。遇魏氏。虜之。帝時年十餘歲。明宗養爲己子。小字二十三。帝幼謹重。寡言。及壯。長七尺餘。方頤大體。材白雄偉。以驍果稱。明宗愛之。在太原嘗與石敬瑭因擊毬。毬入趙襄子廟。見塑土像屹然起立。帝祕之。私心自負。及明宗征討。以力戰知名。莊宗嘗曰。阿三不唯與我同齒。慙戰亦相類。莊宗與梁軍戰於胡柳陂。兩軍俱撓。帝衛莊宗奪土山。摧驍陣。其軍復振。天祐十八年。梁人攻德勝砦。莊宗命明宗符存審爲兩翼以抗之。自以中軍前擊梁軍。退却。帝以十數騎。

雜梁軍而退至壘門大呼斬首數級齊其望櫓而還
帝先與樞密使安重誨在常山因杯盤失意帝以拳
擊重誨腦中其櫛走而獲免帝雖悔謝然重誨終
銜之及帝鎮河中重誨知其出入不時因矯宣中旨
令牙將楊彥溫遇出郭則閉門勿納四月帝閱馬於
黃龍莊彥溫閉城拒帝帝聞難遽還遣問其故彥
溫曰但請相公入朝此城不可入也帝止虞鄉以聞明
宗詔帝歸闕遣藥彥稠將兵討彥溫令生致之面要
鞠問收城彥溫已死明宗甚怒之後數日重誨以帝
失守諷宰相論奏行法明宗不悅重誨又自論奏明
宗曰朕爲小將校時家徒衣食不足賴此兒荷石灰
收馬糞存養以至今貴爲天子而不能庇一兒卿欲行

朝典朕未曉其意卿等可速退從他私第閑坐遂
詔歸清化里第不預朝請二年重誨得罪二年五月
封潞王應順元年移鎮太原是時不降制書唯以宣
授而已帝聞之召賓佐將吏以謀之皆曰主上年幼未
親庶事軍國大政悉委朱宏昭等王必無保全之理
判官馬裔孫曰君命召不俟駕行焉諸君凶言非令
圖也是夜帝令李專美草檄求援諸道欲誅君側
之罪朝廷命王思同率師來討外兵大集大將督衆
攻城帝登城垂泣諭於外曰我年未二十從先帝征伐
出生入死金瘡滿身樹立得社稷軍士從我登陣者
多矣今朝廷信任賊臣殘害骨肉且我有何罪因慟
哭聞者哀之時羽林都指揮使楊思謹謂衆曰大相

公吾主也遂引軍自西門入嚴衛都指揮使尹暉亦
引軍自東門入外軍兵潰潰帝整衆而東次長安劉遂
雍以城降次靈口誅王思同次華州收樂彥稠繫獄
次陝州康義誠軍前兵士相繼來降駕下諸軍畢至
誅宣徽使孟漢瓊於路左是夜閔帝與帳下親騎百
餘出元武門而去四月壬申帝至蔣橋文武百官立
班奉迎教旨以未拜梓宮未可相見俟會於至德宮
帝入伏梓宮慟哭宰相馮道等上牋勸進乙亥赴西
宮樞前告奠即位改元清泰帝在鳳翔日有鼓
者張濛自言知術數事太白山神其神祠即元魏時
崔浩廟也時之否泰人之休咎濛告於神即傳其吉
凶之言帝親校房畧酷信之一日濛至府聞帝語聲

駭然曰非人臣也。嵩詢其事，即傳神語曰：三珠併一珠，驢馬没人驅。歲月甲庚午，中興戊己土。長興四年，府廨諸門無故自動，人頗駭異。遣嵩問濛，濛曰：不出三日，當有恩命。是夜報至，封潞王。及帝移鎮河東，甚懼。問濛，濛曰：王保無患。王思同兵至，又詰之。濛曰：王有天下，不能獨力。朝廷兵來迎王也。至是，帝受冊冊曰：維應順元年歲次甲午四月庚午朔，帝迴視房。嵩曰：張濛神言甲庚午不亦異乎？帝令嵩共術士解三珠事，言三珠三帝也。驢馬没人驅，失位也。帝即位之後，以濛爲將作少監。帝初封潞王，言事者云：一足已入洛矣。又帝在鳳翔，日有何叟者暴卒，見陰官凭几告叟曰：爲吾言於潞王。來年三月當爲天子。二十

三年叟既蘇懼不敢言逾月復卒陰官見而叱之曰
安得違吾言不達其事再放汝還退見廊廡下簿
書以問主者曰朝代將易此即陞降人籍之簿也及
蘇詣帝親校劉延朗告之帝召而問之叟曰請質
之此言無徵戮之可也去二十三蓋帝之小字也又石
壕人胡杲通善天文帝召問之曰王貴不可言若舉
動宜以乙未年及舉兵又問之杲通曰今歲部首王
者不宜建功立事俟來歲入朝則福祿永遠矣其後
皆驗夫如是則大寶之位必有其數可輕言哉帝素
輕財好施自歧下爲諸軍推戴告軍士曰候入洛人
賞百千至是以府藏空匱於是有配率之令京城庶
士扼溺自絕者相繼七月立沛國夫人劉氏爲皇后

十月宰臣姚顗奏吏部三銓近年併爲司望令依舊分銓從之二年宰臣盧文紀等上疏其略曰肅宗初平寇難再復寰瀛自上元後於長安東內置延英殿宰臣如有奏議聖日或特有宣旨於前一日上聞對御之時祇奉冕旒旁無侍衛獻可替否得曲盡於討論捨短從長故無虞於漏洩伏望聖慈俯循故事或有事關軍國謀繫否臧未果決於聖懷要詢訪於臣輩則請依延英故事前一日傳宣或臣等有所聽聞切關利害難形文字須面敷敷臣等亦依故事前一日請開延英當君臣奏議之時祇請機要臣寮侍立左右帝詔褒嘉嘉三年河東節度使石敬瑭叛張敬達進軍攻討初帝疑河東有異志與近臣

語及其事帝曰石郎與朕近親在不疑之地流言毀譽朕心自明萬一失歡如何和解左右皆不對翌日欲移敬瑭於鄆州房曷等堅言不可司天監趙延之亦言星辰失度元宜安靜由是稍緩其事薛文遇獨宿於禁中帝召之諭以太原之事文遇奏曰臣聞作舍於道三年不成國家利害斷自宸旨以臣料之敬瑭除亦叛不除亦叛不如先事圖之帝喜曰聞卿此言豁吾憤氣居六七日敬瑭上章云明宗社稷陛下纂承未契輿情宜推令辟帝幸懷州臣下勸其親征則曰卿輩勿說石郎使我心膽墮地十一月行營副招討使楊光遠殺招討使張敬達於晉安寨以兵降契丹□□並以漢軍與敬瑭立敬瑭為大晉皇帝約爲父

子之國改元天福帝還宮晉高祖至河陽帝舉族與
皇太后曹氏自燔於元武樓晉高祖入洛得帝燼骨
於火中詔葬徽陵帝在位二年年五十二

右後唐莊宗至末帝四主共二十四年入晉

通紀卷第十三

通紀卷第十四

五代

晉高祖

少帝

漢高祖

隱帝

高祖姓石氏諱敬瑭太原人本衛大夫礮漢丞相奮之後四代祖璟追尊爲孝安皇帝三代祖邰追尊爲孝簡皇帝祖瑋追尊爲孝平皇帝考諱紹雍蕃字臬振雞善騎射有經遠大略事後唐武皇及莊宗累立戰功與周德威相亞歷平洛二州刺史追尊爲孝元皇帝帝即孝元第二子母孝元懿皇后何氏生時白氣充庭人甚異焉及長性沉澹寡言笑讀兵法重李牧周亞夫行事唐明宗爲代州刺史每深心器之因妻以愛女唐莊宗聞其善射擢居左右天祐十二年莊

宗併有河北之地開府於鄴梁遣上將劉鄩以兵五萬營於莘十三年鄩引庇突至清平薄於城下莊宗至自甘陵兵未陣多爲鄩所掩帝領十餘騎橫槊深入東西馳哭無敢當者卒全部伍而旋莊宗拊其背曰將門出將言不謬爾因頒以器帛復親爲口口當時以爲異恩十五年莊宗與梁軍大戰於胡柳陂摠管周德威將左軍前鋒不利德威死之莊宗率步衆五千固守高陵以避敵之銳明宗獨完右廣伏於土山之下顧謂帝曰梁人首獲其利旌旗甚整何計可以挫之帝曰臘候如此出手墮指彼多步衆易進難退莫若啜糲飲水徐而困之且超乘徒行其勢不守一擊而破期在必勝明宗曰是吾心也會日暮梁軍列

於平野五六萬人爲一方陣麾遊騎以迫唐軍帝曰敵將遁矣乃請明宗令士整首寬而羅之命左射軍三百人鳴矢馳轉漸東其勢以數千騎合之迨夜旌旗皆靡而一角先潰三面踵之其牙竿相擊橫屍積甲不可勝計由是梁人勢削莊宗即位於鄴帝以五十騎從明宗取鄆涉濟突東門而入鄆兵來拒帝中刃翼明宗遂拔中城旣而平汴水滅梁室致莊宗一統集明宗大勲帝與唐末帝功居其最明宗長興二年改河陽節度使仍兼兵柄北面頻奏報契丹族移帳近塞吐渾突厥已侵邊地戍兵雖多未有統帥帝奏願行加兼侍中閔帝應順元年加帝中書令帝性簡儉未嘗以聲色滋味輒自燕樂每公退必召幕客論

民間利害及刑政得失明而難犯事多親決有店婦與軍士訟云曝粟於門爲馬所食而軍士懇訴無以自明帝謂鞠吏曰兩訟未分何以爲斷可殺馬剗腸而視其粟有則軍士誅無則婦人死遂殺馬馬腸無粟因戮其婦人境內肅然莫敢以欺事言者岐陽兵亂推潞王爲天子閔帝目洛陽出奔於衛相遇於途事見閔帝篇末帝清泰二年移鄆州節度使進封趙口公尋降詔促帝赴任帝心疑之乃召寮佐曰今天子用后族委邪臣沉湎荒惑萬機停滯失刑失賞不亡何待吾自應順中少主出奔之日覩人情大去不能扶危持顛憤憤於方寸者三年矣今我無異志朝廷自啓禍機不可安然死於道路况太原險固之地

積粟甚多若且寬我我當奉之必若加兵我則外告
隣方北構強兵興亡之數皎皎在天今欲發表稱疾
以俟其意諸公以爲如何桑維翰劉知遠贊成密計
遂拒末帝之命朝廷以帝不奉詔降制削奪官爵即
詔晉州招討張敬達領兵圍帝於晉陽帝尋命桑
維翰求援契丹九月契丹酋長耶律氏率衆自鴈門而南
旌騎不絕五十里餘與南軍騎將高行周符彥卿等
合戰時張敬達楊光遠列陣山下敬達等步兵大
敗死者萬人契丹乃命等壇於晉陽城南冊帝爲大晉
皇帝禮畢帝鼓吹道從而歸始梁開國之歲即唐
天祐四年也潞州行營使李忠安奏壺關縣庶穰鄉
鄉人伐樹樹倒自分兩片內有六字如左書云天十四載

石進梁祖令藏於武庫然莫詳其義至帝即位識者
曰天字取四字中兩畫加之於傍則丙字也四字去中
之兩畫加十字則申字也帝即位之年乃丙申也又易云進
者晉也國號大晉皆符契焉又帝即位之前年年在
乙未鄴西有柵曰李子固清淇合流在其側柵有橋橋
下大鼠與蛇鬪關及日之申蛇不勝而死行人觀者數
百識者志之後唐末帝果滅於申又末帝真定常山
人也有先人舊廬其側有古佛剎剎有石像忽搖動
不已人皆異之及重圍晉陽帝遣腹心何福輕騎求
援北蕃蕃主自將諸部赴之不以繒帛不以珠金若
響應聲謂福曰吾已兆於夢比上帝命我非我意
也時援兵未至偽將張敬達引軍逼城設柵柵將成

忽有大風暴雨搏無以立後築長城城就又爲水潦所壞城終不能合晉陽有北宮宮城之上有祠曰毗沙門天王帝曾焚香修默而禱之經數日城西北闔正受敵處軍候報稱夜來有一人長丈餘介金執斧行於城上久之方不見帝心異之又牙城有僧坊之廡下西北隅有泥神神之首忽一日有煙生其騰郁如曲突之狀坊僧奔赴以爲人火所延及俯而視之無所有焉事尋達帝帝召僧之臘高者問焉僧曰貧道見莊宗將得天下曾有此煙觀此噴湧甚於當時兆可知矣自此日傍多有五色雲氣如蓮芰之狀帝召占者視之謂曰此驗應誰占者曰見處爲瑞更應何人又帝每詰旦使慰撫守陴者率以爲常勿心一夕已曠城上有

號令之聲不絕者三帝使人問之將吏云從上傳來者皆知神助時城中復有數家井泉暴溢不止及蕃軍大至合勢破之末帝之衆似拉朽焉斯天運使然非人力也改元天福車駕至昭義北主舉酒言於帝曰予遠來赴義大事已成皇帝須赴京都至河陽望見洛陽煙火唐末帝聚其族登元武樓自焚死車駕入洛御文明殿受朝賀用唐禮樂二年詔宜於唐朝宗屬中取一人封公世襲兼隋之鄴公為二王後以後周介公備三恪主其祭祀左僕射劉昫等議立宗廟以立高祖已下四親廟其始祖一廟伏候聖裁御史中丞張昭議請依隋唐之制立四廟推四世之中名位高者為太祖詔下百官定議百官請依唐朝追尊四

廟爲定從之宰臣監修國史趙瑩奏請循近例依唐
明宗朝凡有內廷公事及言動之間委端明殿學士
或樞密院學士侍立冕旒繫日編錄逐季送當館其
百司公事亦望逐季送當館旋要編修日歷從之天咸二年趙瑩上言應內中公事及諸書奏對不
到中書者請本內各一人抄錄月終送史館三年詔給平章

事馮道門戟十六枝桑維翰李崧十二枝十月御札曰
爲國之規在於敏政建都之法務要利民歷考前經
朗然通論顧惟涼德獲啓丕基當數朝戰伐之餘
是兆庶傷殘之後車徒旣廣帑廩咸虛經年之輓粟
飛芻繼日而勞民動衆常煩漕運不給供湏今汴州
水陸要衝山河形勝乃萬庾千箱之地是四通八達之
郊爰自按巡益觀宜便俾外都邑以利兵民汴州宜

升爲東京置開封府洛京改爲西京雍京改爲晉昌軍四年史館奏請令宰臣一人撰錄時政記逐時以備撰述從之七年帝不豫崩壽五十一謚曰聖文章武明德孝皇帝廟號高祖葬并顯陵

少帝名重貴高祖從子考諱敬儒母安氏敬儒嘗爲唐莊宗騎將早薨高祖以帝爲子帝少而謹厚高祖愛之但性好馳射有祖禰之風高祖受契丹冊將入洛欲留一子撫晉陽先謀於契丹契丹曰使諸子盡出吾當擇之乃於行中指帝謂高祖曰此眼大者可遂以爲北京留守行太原尹天福三年進封齊王六年從高祖幸鄴都是歲遇旱高祖遣帝祈雨於白龍潭有白龍見於潭心是日澍雨尺餘高

祖崩承遺制命樞前即皇帝位帝在并未著人望
及保釐浚郊大有寬裕之稱詔州郡稅鹽過稅斤
七錢住稅斤十錢州府鹽院並省司差人勾當先是
諸州府除蠶鹽外每年海鹽界分約收鹽價錢一
千七萬貫高祖以所在禁法抵犯者衆遂開鹽禁許
通商令州郡配徵人戶食鹽錢上戶千文下戶二百分
爲五等時亦便之至是掌賦者欲增財利難於驟變
前法乃重其關市之征蓋欲絕其興販歸利於官也
其後鹽禁如故鹽錢亦徵至今爲弊焉八年遣內外
臣寮二十八人往諸道州府率借粟麥時使臣希旨
立法甚峻民間碓礱泥封之隱其數者比日斃之由
是人聊生物情胥怨九年正月大霧中有白虹

相偶占曰斯為海淫其下必將有戰契丹寇黎陽上將軍張彥澤率勁騎以禦之遣譯語官孟守忠致書契丹求脩舊好守忠回契丹復書曰已成之勢不可改也太原奏與契丹偉王戰於秀谷斬首三千級生擒五百人獲敵將一十七人賊軍散入鵝鳴谷已進軍追襲二月鄆州奏博州刺史周儒以城降契丹博州殘兵至自敵中滄州奏賊衆三千人援送所掠人口寶貨等由長蘆入蕃以輕騎邀之斬獲千餘人口輜重悉委之而走冀州奏敗賊軍於城下見昇棺者訊其降者曰賊城之戰上將金頭王中流矢而死此其櫬也三月詔天下抽點鄉兵凡七戶出一士六戶資之仍自具兵仗以武定爲號七月大赦天下改

天福九年爲天運元年是日宣赦未畢會大雨雷忽
遽而罷時都下震死者數百人明德門內震落石
龍之首識者以爲石乃國姓蓋不祥之甚也十二月
工部尚書權知貢舉竇貞固奏試進士諸科舉人
入策舊例夜試以三條燭盡爲限天成二年改令
書試今欲依舊夜試從之二年六月監修國史劉昫
史官張昭遠等以新修唐書紀志列傳并目錄凡二
百三卷上之賜器帛有差三年九月契丹瀛州刺史
詐爲書與樂壽監軍王繼願以本城歸順且言城
中蕃軍不滿千人請朝廷發軍龍衣取之已爲內應十
一月北靉行營招討使杜威率諸將領大軍自鄴北
征師次瀛州城下貝州節度使梁漢璋戰死杜威等

以漢璋之敗遂收軍而退行次武疆聞契丹入寇欲
取直路自冀貝而南會張彥澤領騎鎮定至且言
契丹可破之狀於是大軍西趨鎮州十二月契丹與王
師戰於中渡王師不利杜威李守貞等率諸軍降
契丹相州節度使張彥澤受契丹命率先鋒口騎
二千人自封邱門斬關而入俄自寬仁門遞入契丹與
皇太后書帝奉表於契丹曰孫臣某言翁皇帝賜
太后書示諭於滹沱河下降杜威一行馬步兵士見
領番漢步騎來幸汴州者往者唐運告終中原失
馭數窮否極天缺地傾先人有田一成有衆一旅兵連
禍結力屈勢孤翁皇帝救患摧剛興利除害躬擐
甲胄深入寇場犯露蒙霜度鴈門之險馳風擊雪電行

中冀之誅黃鉞一麾天下大定執力凌宇宙義感神明
功成不居遂興晉祚則翁皇帝有大造於石氏也旋
屬天降鞠凶先君即世臣遵承遺旨續紹前基諒闇
之初荒迷失次凡有軍國重事皆委將相大臣至於
擅繼宗祧既非稟命輕發文字輒敢抗尊自啓釁端
果貽赫怒禍至神惑運盡天亡十萬師徒皆望風而
束手億兆黎庶悉延頸以歸心臣負義包羞貪心忍
耻自貽顛覆上累祖宗偷度朝昏苟存視息翁皇帝若
惠顧時昔稍霽雷霆未賜靈誅不絕先祀則百口
荷更生之德一門銜無報之恩雖所願焉非敢望也臣
與太后并妻馮氏及舉家戚屬見於郊野面縛俟罪
及明年正月朔契丹次東京城北帝舉族出封邱門

以迎契丹契丹不與之見泊於封禪寺契丹遂入大
內至昏出宮斬張彥澤以其剽劫京城契丹以僞制降
封帝爲負義侯黃龍府安置其地在渤海國界帝
與皇太后李氏皇太妃安氏皇后馮氏皇弟重睿皇
子延煦延寶俱北行宰臣趙瑩樞密使馮玉侍衛李
彥韜隨帝入蕃契丹遣三百騎援送而去帝過中
渡橋閱杜重威營寨之迹慨然憤歎謂左右曰我
家何負爲此賊所破天乎天乎於是號慟而去渡遼
水至黃龍府即契丹所命安置之地契丹國母召帝
一行往懷密州會國母爲永康王所執永康王請帝
却往遼陽城駐泊太后馳至霸州詣永康求於漢兒
城寨側近賜養種之地永康許諾令太后於建州住

泊漢乾祐二年帝自遼陽城發赴建州至建州節度使趙延暉盡禮迎奉館帝於衙署中其後割寨地五千餘頃其地至建州數十里帝乃令一行人負於寨地內築室分耕給食於帝乾祐三年八月太后薨周顯德初有漢人自寨而至者言帝與后及諸子俱無恙猶在建州其隨從職官役使人輩自番中亡歸物故者大半矣

古晉自高祖至末帝二帝共十一年入漢

高祖皇帝姓劉本名知遠及即位改諱曰高其先沙陀部人帝有天下追尊四代祖端為明元皇帝曾祖昂為恭僖皇帝祖僕為昭獻皇帝考瑊為章聖皇帝母安氏帝弱不好弄嚴重寡言及長面紫色目睛多

白初事唐明宗列於麾下明宗與梁人對柵於德勝時晉高祖爲梁人所襲馬甲連革斷帝輟騎以授之取斷革者自跨之徐歿其後明宗踐阼晉高祖爲北京留守以帝有護援之力奏移麾下署爲牙門都校應順初晉高祖鎮常山唐閔帝召赴闕會閔帝出奔與晉高祖相遇於途遂俱入衛州泊于郵舍閔帝左右謀害晉高祖帝密遣御士石敢袖鎚立高祖後及有變敢擁晉高祖入一室以巨木塞門敢尋死焉帝率衆盡殺閔帝左右危晉高祖於難清泰元年晉高祖鎮汶陽帝勸晉高祖舉義贊成密計經綸之始中外賴之及契丹以全軍赴難破張敬達之衆於晉陽晉國初建加檢校司空尋改陝州節度使

契丹送晉高祖至上黨指帝謂高祖曰此都軍甚口
□無大故不可棄之晉祖入洛委帝巡警都邑肅然
無敢犯今天福三年十月如檢校太尉十二月加同平
章事六年授北京留守河東節度使七年加侍中時
天下大蝗惟不入河東界晉少帝即位加檢校太師八
年進位中書令開運元年正月契丹南下契丹以大軍
直抵澶州遣將偉王率兵入鴈門以帝爲幽州道招
討使帝大破偉王軍於忻口尋奉詔起兵出土門軍
至樂平會契丹退乃還三月封太原王二年封北平王
十一月契丹率蕃漢大軍由易定抵鎮州杜重威等
駐軍於中渡橋禦之十二月重威等全軍降於契丹
張彥澤受契丹命陷京城遷少帝於開封府帝聞之

大駭分兵守境以備寇患天福十二年正月契丹入東京晉少帝北遷二月契丹具漢法服受朝僞制改晉國為大遼國號會同十年帝遣王峻奉表於契丹主賜僞詔褒美呼帝為兒賜木枴一蕃法貴重大臣方得此賜亦猶漢法賜几杖之比也王峻持枴而歸契丹望之皆避路及峻至太原帝知契丹政已亂乃議建號焉是月河東行軍司馬張彥威與文武將吏等以中原無主帝威望日隆群情所屬上成勸進帝謙讓不允自是三上牋諸軍緇黃耆老至迫請教答允之帝於太原宮受冊即白王帝位改晉開運四年為天福十二年帝以晉帝舉族北遷憤懣久之率親兵趨土門路邀迎晉帝至壽陽聞其已過乃還

契丹聞帝建號偽制削奪帝官爵三月契丹發自東京還本國趨相州四月己未陷相州契丹北去是月契丹主耶律德光卒於鎮之樂城五月兀欲召蕃漢臣寮於鎮州于署矯其手遺詔命兀欲嗣位爲永康王六月帝車駕至東京以國號爲大漢年號依舊稱天福七月以太祖高皇帝世祖光武皇帝爲不祧之廟追尊高曾已下四廟天福十三年正月改爲乾祐元年帝不豫崩于萬歲殿年五十四二月朔降遺制周王承祐於柩前即皇帝位謚曰睿文聖武昭肅孝皇帝廟號高祖葬於睿陵

隱帝諱承祐高祖第二子母李太后高祖鎮太原署節院使累官至檢校尚書國初遷檢校太保高祖崩

授特進檢校太尉封周王於樞前即皇帝位乾祐三年誅樞密使楊邠侍衛都指揮使史宏肇三司使王章夷其族帝遣腹心賁密詔往澶州鄴都令澶州節度使李洪義誅侍衛步軍都指揮使王殷令鄴都屯駐護聖左廂都指揮使郭崇奉國左廂都指揮使曹英害樞密使郭威及宣徽使王峻洪義受得密詔知事不克乃引使人見殷殷與洪義遣本州副使陳光穗賁所受詔馳至鄴都威得之即召峻崇英及諸軍將校至牙署視詔兼告楊史諸公冤枉之狀且曰汝等當奉行詔旨斷予首以報天子自取功名崇等前曰此事非必聖意即是太子業等竊發假如此輩便握權柄固得安乎崇等願從公入朝面自洗

雪於是將校等請威入朝以除君側之惡共安天下
翌日威以衆南行帝詔張彥超等率禁軍赴澶州
守捉帝先遣小監龍馬脫偵鄴軍所至爲游騎所獲威
即遣回因令附奏赴闕之意仍以密奏置龍馬脫衣領
中帝覽奏即召李業示之聶文進郭元明在傍懼形
于色及聞鄴兵已至河上帝大懼松謂宰臣竇貞固
等曰昨來之事大草草耳鄴軍至封邱慕容彥超
自鎮馳至帝遂以軍旅之事委之彥超謂帝曰陛下
勿憂臣當生致其魁首彥超退見文進詢北來兵數
及將校名氏文進告之彥超懼曰大是劇賊不宜輕
耳車駕出幸七里店軍官王師陣於劉子陂與鄴
軍相望彥超輕脫先擊北軍威命何福進王彥超李

筠等大合騎以乘之彥超退却死者百餘人於是諸軍奪氣稍稍奔於北軍吳虔裕張彥超等相繼而去慕容彥超以部下十數騎奔兗州是夜帝與宰臣從官宿野次侯益焦繼勳潛奔鄴軍帝旦策馬至元化門劉銖在門上問帝左右兵馬何在乃射左右帝迴與蘇逢吉郭允明詣西北村舍允明知事不濟剗刃於帝而崩時年二十逢吉允明皆自殺周太祖入京城命有司遷帝梓宮於太平宮太后詔議立高祖從子徐州節度使實爲嗣遣前太師馮道等往徐州奉迎周太祖以嗣君未至請太后臨朝河北諸州馳報契丹深入十二月郭威領大軍北征威次澶州何福進以下及諸軍將士扶擁威請爲天子即日南還上章于太后

太后命樞密使侍中郭威監國誥曰比者樞密使郭威志安宗社議立長君以徐州節度使贊高祖近親立爲漢嗣爰自藩鎮召赴京師雖誥命尋行而軍情不附天道在北人情靡東適當改卜之初俛膺分土之命可降封湘陰公明年正月太后誥奉符寶於監國可即皇帝位周太祖詔太常謚帝曰隱苑并潁陵帝姿白皙眉目踈朗未即位時目多閃掣唾涕不止即位之始遽無此態難作復如故帝開西平定之後稍生驕易然畏憚大臣未至縱恣嘗因乾象差忒宮中或有怪異召司天監趙延乂訊其休咎延乂對以脩德即無患既退遣中使就問延乂曰何者爲德延乂勸讀貞觀政要後與聶文進郭允明□□狎習信其

邪說以至于敗高祖之征鄴城也一日帝語周太祖曰
我夜來夢爾爲驢負我升天旣捨爾俄變爲龍捨
我南去是何祥也周太祖撫掌而笑冥符肝鑾豈偶
然哉

右漢高祖至隱帝凡二帝共四年入周

通紀卷第十四